



INATSISARTUNI

Partii Inuit
Randi Broberg

UPA 2014/145-1
1.4.2014

Pillugu siunnersuut: **Radiukkut tv-kkullu aallakaatitsisarneq pil-lugu Inatsisartut Inatsisaat nr. XX, XX.XXX 2014-imeersoq.**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Partii Inuit malugaarput, siulersuisunut ilaasortat tassaammata KNR'ip ataatsimut aqunneqarneranut tunngasunut sammiveqartuusut, innuttaasunillu kiffartuussinissamik isumaqatigiissutip eqqortinneqarnissaanik qulakkeerinnittussaasut, aallakaatitallu qanoq imal. sunik immersorneqarneranut tunngasuni susassaqqanngitsut.

Taamaakkaluartoq oqaatigerusupparput taamatut KNR-ip siulersuisui sunniuteqarnerulersinniarlugit aalajangiisinnaassuseqarnerallu nukittorsarniarlugu inatsimmik nutarterinikkut aamma qulakkeerneqarsinnaasariaqartoq KNR-mi illuinnaasiunngittumik tusagassioriaaseqarnerup illersorneqarnissaa. Tamannalu siulersuisut aqqissuuteqqinneranni akisussaaffinnut ilaasariaqartutut isigaarput. Malugiuartaratsigu ullumikkut illuinnaasiunngittumik tusagassioriaaseqarneq qulakkeerneqarsinnaaneq ajortoq.

Siunnersuummi nuannaajallaatissatut taasariaqarpoq ilanngunneqartoq tassalu KNR-p atuisut siunnersuisoqatigiiviniq pilersitsinissaq, assigiinngitsunik soqutigisallit KNR-ip siulersuisuinut isummaminnik saqqummiussisinnaanissaat sunniuteqarnissaallu qulakkeerniarlugu. Tamannaammammi pisariaqartilluinnagarput, massakutut KNR –p ingerlanera eqqarsaatigalugu.

Partii Inuit maluginiarparput, Naalakkersuisup saqqummiussamini eqqaagaa, KNR'ip siulersuisuisa inuttalersornerat siunnersuutikkut allanngortinniarneqartoq, ilaasortanik marlunnik ilanngarlugit arfineq-marlunngortinnerisigut. Tamannalu ukiumut kr. 150.000'nik sipaarutaassasoq. Tamannalu tunngaviumik Partii Inuit allaffissornikkut aningaasartuutikillisaanermik anguniagaanut naapertuuppoq.

Taamaattoq siulersuisuni ilaasortassat amerlanerussutillit naalakkersuisumit toqqarneqartalernissaat eqqarsarnartoqartipparput. Tassami naalakkersuinikkut qalipaasersungaanninnissaq qanoq tassuunakkut qulakkeerneqarsinnaassava, ingammik pissutsit maanna naalakkersuisuuffimmi akueriuminaattut nalaatereerlugit apeqqusiinerput



INATSISARTUNI

tassaniippoq. Kiisalu KNR-p siulersuisui amerlanerussutillit naalakkersuisumit toqarneqartalerpata, qanoq KNR-p pittaassusissaanut tamanna qulakkeerisuussava?

Uiggiullugumi siunnersuutigineqarportaaq, siulersuisutut piginnaasaqarfissatut piunasaqaatit qaffanneqassasut.

Partii Inuit isumaqarpugut qitiulluinnartumik pingaaruteqartoq, siulersuisutut issiasut nunaqaqqaartuunissaat inuttullu oqaatsitsinnik oqaaseqartuussasut. Tassami maannakkutut KNR ingerlatillugu kinaassuseerukkaluttuinnartut inissisimalersimanera akueriuminaattorujussuummat, KNR tassaajuartariaqarpoq kinaassutsitsinnik timitalimmik pingaartitsiffik.

Una siunnersuut taamaatillugu akuerineqassagaluarani, uagut nunaqaqqaartutut inuttullu oqaaseqartutut soqutigisatta tunullunneqarnissaat, Partii Inuit qularutiginnngilarput.

1979' imiit ulloq mannarpiaq tikillugu inatsisartoqarnikkut, naalakkersuinikkut allaffissornikkullu takutinneqartuarpoq, uagut nunaqaqqaartutut inuttullu oqaaseqartuusutut piginnaasagut upperineqangitsut, atorumaneqangitsut piorsarneqarusunnngitsullu.

Siulersuisut piginnaasassaannik qaffaanikkut, uagut nunaqaqqaartutut inuttullu oqaaseqartuusutut aasiit akimmiffilersorniarneqarnerput akuerisinnaanngilarput. Tassunga atasumik siulersuisut nunaqaqqaartuunissaat inuttullu oqaaseqartuunissaat Partii Inuit pingaartitarilluinnaratsigu oqaatigissavarput.

Sumiiffinni nipi assilissallu atorlugit aallakaatitsiviit aallakaatitassiorfiillu pillugit, Partii Inuit maluginiarparput annikikkaluamik tapiissuteqartarsimaneq siunnersuutikkut atorunnaarsinniarneqartoq. Aningaasaateqarfinnut qinnuteqarsinnaaneq innersuussutigineqarluni.

Partii Inuit tamanna akuersaarsinnaanngilarput. Illuatungaani sumiiffinni nipi assilissallu atorlugit aallakaatitsiviit aallakaatitassiorfiillu atorneqarnerunissaat pingaarutilittut isigaarput.

Taamaattumik Partii Inuit kaammattuutigissavarput, nipi assilissallu atorlugit aallakaatitsiviit aallakaatitassiorfiillu siunissami atorneqarnerunissaat ineriartortitsinnaanerilu siunertaralugit, aningaasaliissuteqarnikkut tapiissutinik atuisinnaaneq annertusarneqartariaqartoq.

Partii Inuit isaanniit qularutissaanngilaq ullumikkut nammineq suliatinnik aallakaatitassiorneq naammaginannngilluinnartoq, inuiattullu namminersornitsinnut naapertuutinngilluinnartoq.



INATSISARTUNI

4.

Siunnersuummi § 20. Imm. 9. qiviraanni, aaliangersakkat taama ittut isumaqanngillat. Danskisuummi oqaasillit sullinneqarnerat nunaqaqqaartunut inuttullu oqaaseqartuusunut sanilliukkaanni, pitsaanerujussoreerpoq.

Siunnersuummi § 21. aamma § 21. Imm. 2. eqqarsaatigalugit, Partii Inuit eqqaasissutigissavarput, nunami maani meerartatta 79%’ii inuttut oqaatsit ulluinnarni atugarimmatigik, taakkuullutillu danskit oqaasiinik atuiniarnermikkut akimmiffeqartinneqartut. Tassunga sanilliukkutsigu KNR’imi TV’kkut aallakaatitat meerartatsinnoortut danskit oqaasii atorlugit tunisassiat KNR’ikkullu aallakaateqqinneqartartut annertunerpaartaat danskisuujujernerusartut, uagullu nammineq tunisassiarisimagutsigik qanganitsereersimasut tunisassiaasimasarlutik, taamalu ullutsinni atukkatsinnut pisariaqartitatsinnullu naapertuutinngilluinnarlutik.

Partii Inuit isumarput naapertorlugu, tamakkuupput takussutissat uagut nunaqaqqaartutut inuttullu oqaaseqartuusugut atukkatta qanoq inatsisartunit, naalakkersuisuniit ingerlatsivinniillu soqutigineqanngitsigisut – ulloq manna tikillugu.

5.

§ 28. Imm. 4. Partii Inuit isumarput naapertorlugu siunnersuummit peerneqartariaqarpoq. Aaliangersagaq taannarpiaavoq, tusarnaagassianik isiginnaagassianillu sanaartornitsinnik pakkersimaarinnittoq unitsitsisuusorlu. Maleruaqqusaq taanna naapertorlugu KNR qanorsuaq aallakaateqqitanik immersuisinnaavoq, taakkulu aallakaateqqitat nalunaarsuinermi uagut nunaqaqqaartutut inuttullu oqaaseqartutut pisariaqartitatsinnut matussutit nipangersaatitullu atorneqaannarlutik.

6.

Naggataatigut Partii Inuit qamanga pisumik, inatsisartut maani issiasut kaammattussavagut, KNR pillugu Nalunaarusiaq December 2012’imeersumi, siunissami KNR’ip qanoq aaqqissuivigineqarsinnaaneranut atasumik takorluukkat pingajuat piviusunngortinniarlugu ataatsimut oqariartuuteqarnissaat.

Tassani KNR’ip tamakkiisumik inuttut oqaatsigut atorlugit ingerlanneqalernissaa oqariartuutiginerpoq. Partii Inuit isumarput naapertorlugu, namminersornitta oqaasiinnaanani oqaasiinnatiguunngitsoq piviusumik immersuinissamut periarfissatsialak naapiffigitigu!.



INATSISARTUNI

Taama oqaaseqarluta siunnersuutip aappassaaneerpeqannginnerani, piorsarsimassutsimut ataatsimiititami isumaliutissiisoqarnissaa ujartorparput. Ilatigut Partii Inuit tikkuakkagut aallaavigalugit.